

**Վարչական տույժ նշանակելու մասին**

«30» նոյեմբերի 2021թ.

ք. Երևան

ՀՀ պետական եկամուտների կոմիտեի իրավաբանական վարչության պետ Արման Մնացականյանս, քննելով մաքսային ձևակերպումների մասնագետ Գոռ Ստեփանյանի վերաբերյալ նյութերը.

**Պ Ա Ր Զ Ե Ց Ի՝**

ՀՀ ՊԵԿ հետքագրողումային հսկողության վարչության աշխատակիցները, իրականացրել են արտագնա մաքսային ստուգում «ԱԳՐՈ ՄԱՍՏԵՐ» ՍՊ ընկերությունում և հայտնաբերել, որ «ԱԳՐՈ ՄԱՍՏԵՐ» ՍՊ ընկերության անվամբ մի շարք ապրանքների հայտարարագրերով ՀՀ ներմուծված և ԵԱՏՄ ԱՏԳ ԱԱ 5305 00 000 0 ծածկագրով հայտարարագրված «Հնդկընկույզի/կոկոսի/մանրաթել՝ խտացված, հակերի տեսքով, բույսերի աճեցման համար» ապրանքատեսակը հայտարարագրվել է ծածկագրի վերաբերյալ ոչ ճշգրիտ տեղեկություններով:

ՀՀ ՊԵԿ մաքսային հսկողության վարչության պետի 30.09.2021թ. «Ապրանքի ոչ ճիշտ դասակարգում հայտնաբերվելու դեպքում ապրանքի դասակարգման վերաբերյալ» թիվ ԱԴՈ-21-000083 որոշման համաձայն՝ հայտարարագրված ապրանքներն իրենցից ներկայացնում են «Կոկոսի հիմք (սուբստրատ)»՝ հումքի տեսքով կոկոսի մանրաթելերի և կեղևից անջատված կոկոսի մանրաթելերի մանր մասերի խառնուրդ, որպես տեքստիլ նյութեր մշակման չենթարկված, մամլված շերտեր և օգտագործվում է՝ տարբեր բույսերի աճեցման համար (հիմնականում խոնավասեր), որոնք ենթակա են հայտարարագրման ԵԱՏՄ ԱՏԳ ԱԱ 1404 90 000 8 ծածկագրով (մաքսատուրքի դրույքաչափը 8%, ԱԱՀ՝ 20%):

Իրականացված մաքսային ստուգման արդյունքում 05.10.2021թ. կազմվել է թիվ 0058-Ա ստուգման ակտը և «ԱԳՐՈ ՄԱՍՏԵՐ» ՍՊ ընկերությանն առաջարկվել է կատարել վերահայտարարագրում ԵԱՏՄ ԱՏԳ ԱԱ ճշգրիտ ծածկագրին համապատասխան՝ վճարելով պակաս վճարված մաքսային վճարները:

Մաքսային ստուգման նյութերն ուղարկվել են ՀՀ ՊԵԿ իրավաբանական վարչություն մաքսային կանոնների խախտման հատկանիշների հարցը պարզելու համար:

Հաշվի առնելով, որ մաքսային մարմին ներկայացված մաքսային հայտարարագրում ոչ ճշգրիտ տեղեկություններ նշելու հետևանքով «ԱԳՐՈ ՄԱՍՏԵՐ» ՍՊ ընկերության կողմից պակաս հաշվարկված մաքսային վճարները գերազանցել են «Նվազագույն աշխատավարձի մասին» ՀՀ օրենքի 3-րդ հոդվածով նախատեսված չորսհազարապատիկի չափը, այսինքն՝ առկա են եղել ՀՀ քրեական օրենսգրքի 205-րդ հոդվածի 1-ին մասով նախատեսված հանցագործության հատկանիշներ, ուստի, ղեկավարվելով «Վարչական իրավախախտումների վերաբերյալ» ՀՀ օրենսգրքի 253-րդ հոդվածով, «ԱԳՐՈ ՄԱՍՏԵՐ» ՍՊ ընկերության վերաբերյալ նյութերը ուղարկվել են ՀՀ ՊԵԿ հետաքննության և օպերատիվ հետախուզության վարչություն:

2021 թվականի նոյեմբերի 1-ին «ԱԳՐՈ ՄԱՍՏԵՐ» ՍՊ ընկերության վերաբերյալ նախապատրաստված նյութերով կայացվել է քրեական գործի հարուցումը մերժելու մասին որոշում, իսկ նախապատրաստված նյութերն ուղարկվել են ՀՀ ՊԵԿ իրավաբանական վարչություն:

Նյութերի ուսումնասիրման արդյունքում պարզվել է, որ թիվ 05100010/050819/0070467 և թիվ 05100010/050819/0070604 ապրանքների հայտարարագրերը ներկայացրել է Գոռ Ստեփանյանը: 2021 թվականի նոյեմբերի 15-ին ՀՀ ՊԵԿ իրավաբանական վարչությունում Գոռ Ստեփանյանի նկատմամբ ՀՀ մաքսային օրենսգրքի 203-րդ հոդվածի 1-ին մասի 2-րդ պարբերության հատկանիշներով կազմվել է մաքսային կանոնների խախտման վերաբերյալ արձանագրություն, որի մեկ օրինակն ուղարկվել է նրան:

ԵԱՏՄ մաքսային օրենսգրքի (այսուհետ՝ Օրենսգիրք) 2-րդ հոդվածի 32-րդ կետի համաձայն՝ «մաքսային հայտարարագիրը» մաքսային փաստաթուղթ է, որը պարունակում է տեղեկություններ ապրանքների վերաբերյալ կամ ապրանքների բացթողման համար անհրաժեշտ այլ տեղեկություններ, իսկ 35-րդ կետի համաձայն՝ մաքսային հայտարարագրումը մաքսային մարմնում մաքսային հայտարարագրի միջոցով ապրանքների վերաբերյալ տեղեկությունների, ընտրված մաքսային ընթացակարգի վերաբերյալ և (կամ) ապրանքների բացթողման համար անհրաժեշտ այլ տեղեկությունների հայտագրումն է: 7-րդ կետի համաձայն՝ հայտարարատուն այն անձն է, որը հայտարարագրում է ապրանքներ կամ որի անունից հայտարարագրվում են ապրանքներ:

Օրենսգրքի 20-րդ հոդվածի 1-ին մասի համաձայն՝ հայտարարատուն և այլ անձինք ապրանքների դասակարգումն իրականացնում են ԱՏԳ ԱԱ-ին համապատասխան՝ մաքսային հայտարարագրման ժամանակ և այն դեպքերում, երբ մաքսային կարգավորման ոլորտի միջազգային պայմանագրերի ու ակտերի համաձայն, մաքսային մարմին են հայտնում ապրանքի ծածկագիրը՝ Արտաքին տնտեսական գործունեության ապրանքային անվանացանկին համապատասխան: Օրենսգրքի 84-րդ հոդվածի 3-րդ կետի համաձայն՝ հայտարարատուն անդամ պետությունների օրենսդրությանը համապատասխան, պատասխանատվություն է կրում սույն հոդվածի 2-րդ կետով նախատեսված պարտականությունները չկատարելու, մաքսային հայտարարագրում ոչ հավաստի տեղեկություններ հայտագրելու համար:

Օրենսգրքի 104-րդ հոդվածի համաձայն՝ ապրանքները ենթակա են մաքսային հայտարարագրման դրանք մաքսային ընթացակարգով ձևակերպելու կամ սույն Օրենսգրքին համապատասխան սահմանված այլ դեպքերում: Մաքսային հայտարարագրումն իրականացվում է հայտարարատուի կամ մաքսային ներկայացուցչի կողմից, եթե սույն օրենսգրքով այլ բան սահմանված չէ: ԵԱՏՄ մաքսային օրենսգրքի 105-րդ հոդվածի համաձայն՝ մաքսային ընթացակարգերով ձևակերպելիս, բացառությամբ «մաքսային տարանցում» մաքսային ընթացակարգի, մաքսային մարմին է ներկայացվում ապրանքների մասին հայտարարագիր: ԵԱՏՄ մաքսային օրենսգրքի 106-րդ հոդվածով սահմանվում են ապրանքների հայտարարագրերում նշման ենթակա տեղեկությունները: 106-րդ հոդվածի 1-ին մասի 4-րդ կետի համաձայն՝ հայտարարագրում նշվում են տեղեկություններ ապրանքների մասին, որոնց մեջ ի թիվս այլոց նշվում է անվանումը, նկարագրությունը, որն անհրաժեշտ է այն մաքսային վճարների, հատուկ, հակազնազցման, փոխհատուցման տուրքերի և այլ վճարների հաշվարկման և գանձման համար, ապրանքների ծածկագիրը՝ Արտաքին տնտեսական գործունեության ապրանքային անվանացանկին համապատասխան:

Օրենսգրքի 404-րդ հոդվածի 1-ին մասի համաձայն՝ մաքսային գործառնություններ իրականացնելիս մաքսային ներկայացուցիչն ռևի նույն իրավունքները, որոնք ունի այն անձը, որը լիազորում է նրան ներկայացնելու իր շահերը մաքսային մարմինների հետ փոխհարաբերություններում: 405-րդ հոդվածի 1-ին մասի 6-րդ կետի համաձայն՝ մաքսային ներկայացուցիչը պարտավոր է կատարել սույն Օրենսգրքով սահմանված և (կամ) անդամ պետությունների՝ մաքսային կարգավորման վերաբերյալ օրենսդրությամբ սահմանվող այլ պարտականություններ: Ելնելով վերոգրյալից, մաքսային միջնորդի և պատվիրատուի փոխհարաբերությունները կարգավորվում են մաքսային ծառայությունների մատուցման պայմանագրով, որը չի կարող հակասել գործող նորմերին:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով

Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 203-րդ հոդվածի 1-ին մասի 2-րդ պարբերության համաձայն՝ Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը, որի արդյունքում առաջանում է մաքսային վճարների պակաս հաշվարկում կամ չհաշվարկում, առաջացնում է տուգանք՝ այդ մաքսային վճարների 50 տոկոսի չափով:

Մաքսային կանոնների խախտումների վերաբերյալ վարույթի շրջանակում հաստատվել է այն հանգամանքը, որ մաքսային ձևակերպումների մասնագետ Գոռ Ստեփանյանը ապրանքի նկարագրության ուսումնասիրությունից կարող էր պարզել, որ «Հնդկընկույզի/կոկոսի/ մանրաթել՝ խտացված, հակերի տեսքով, բույսերի աճեցման համար» ապրանքի նկարագրությունը հաստատում է դրանց «Կոկոսի հիմք (սուբստրատ)»՝ հումքի տեսքով կոկոսի մանրաթելերի և կեղևից անջատված կոկոսի մանրաթելերի մանր մասերի խառնուրդ, որպես տեքսիլ նյութեր մշակման չենթարկված, մամլված շերտեր լինելու և տարբեր բույսերի աճեցման համար (հիմնականում խոնավասեր) նախատեսված լինելու հանգամանքը և պետք է միջոցներ ձեռնարկեր համապատասխան ծածկագրով դասակարգելու համար:

Մաքսային ձևակերպումների մասնագետ Գոռ Ստեփանյանը 2021 թվականի նոյեմբերի 30-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 203-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն ՀՀ մաքսային օրենսգրքի 219-րդ հոդվածի՝ չներկայանալու դեպքում վարչական գործի քննությունը կիրականացվի իր բացակայությամբ:

Այսպիսով, գործի նյութերով պարզվել է, որ «ԱԳՐՈ ՄԱՍՏԵՐ» ՍՊ ընկերության անվամբ թիվ 05100010/050819/0070467 և թիվ 05100010/050819/0070604 ապրանքների հայտարարագրերով ՀՀ ներմուծված և փաստացի ԵԱՏՄ ԱՏԳ ԱԱ 1404 90 000 8 ծածկագրով հայտարարագրման ենթակա ապրանքները մաքսային ձևակերպումների մասնագետ Գոռ Ստեփանյանը հայտարարագրել է ոչ ճշգրիտ ԵԱՏՄ ԱՏԳ ԱԱ 5305 00 000 0 ծածկագրով, ինչի հետևանքով առաջացել են 10851370 ՀՀ դրամի չափով պակաս հաշվարկված մաքսային վճարներ, այսինքն՝ Գոռ Ստեփանյանը թույլ է տվել ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ նախատեսված մաքսային կանոնների խախտում, ինչը հիմնավորվում է ՀՀ ՊԵԿ մաքսային հսկողության վարչության 30.09.2021թ. «Ապրանքի ոչ ճիշտ դասակարգում հայտնաբերվելու դեպքում ապրանքի դասակարգման վերաբերյալ» թիվ ԱԴՈ-21-000083 որոշմամբ, ՀՀ ՊԵԿ հետբացթողումային հսկողության վարչության 05.10.2021թ. թիվ 0058-Ո-1 որոշմամբ, 05.10.2021թ. թիվ 0058-Ա ստուգման ակտով, թիվ 05100010/050819/0070467 և թիվ 05100010/050819/0070604 ապրանքների հայտարարագրերով:

Վերոգրյալի հիման վրա և ղեկավարվելով ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ, 206-րդ և 221-րդ հոդվածներով,

## Ո Ր Ո Շ Ե Ց Ի՝

1. Գոռ Ստեփանյանին (անձնագրի համար՝ AT0503750) ճանաչել զանցառու ՀՀ մաքսային օրենսգրքի 203-րդ հոդվածի 1-ին մասի 2-րդ պարբերությամբ և նրան տուգանել 5425685 ՀՀ դրամ: /900005024055 (կող-19) հաշվեհամարին/

2. Որոշման մասին հայտնել Գոռ Ստեփանյանին՝ պարզաբանելով, որ ՀՀ մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ այն կայացնելուց հետո 10 օրվա ընթացքում կամ Վարչական դատարան երկու ամսվա ընթացքում:

ԻՐԱՎԱԲԱՆԱԿԱՆ

ՎԱՐՉՈՒԹՅԱՆ ՊԵՏ՝



Ա. ՄՆԱՅԱԿԱՆՅԱՆ